



Publicaziuns dalla vischnaunca, jamna 35

Elecciuns communalas 2013

A caschun dallas votaziuns communalas dils 3 da mars 2013 ei l'iniziativa per ina midada dalla constituziun communal vegnida approbada. Cunquei che l'iniziativa ei vegnida inoltrada en fuorma d'in text formulau, ei la revisiun parziala dalla constituziun communal entrada en vigur entras l'approbaziun dalla Regenza cantunala dils 21 da matg 2013.

Sebasond sin art. 82 dalla constituziun communal succeda l'elecziun dalla cumissiun da gestiun el decuors digl onn 2013. La nova cumissiun da gestiun entra en uffeci igl emprum da schaner 2014. L'elecziun dalla cumissiun da gestiun succeda all'urna e quei tenor las prescripziuns dalla constituziun communal e dalla lescha davart ils dretgs politics.

Cunquei ch'ils commembers dalla cumissiun da gestiun astgan buca appartener il medem mument al cussegl da vischnaunca (art. 52 dalla constituziun communal), han Rita Huonder-Tenner ed Edgar Durschei inoltrau sin la fin 2013 lur abdicaziun sco commembers dalla cumissiun da gestiun. Beat Hosang ei sedeclaus prompts da star a disposiziun per las elecziuns dalla cumissiun da gestiun pils onns 2014/2016.

Termin e propostas

L'elecziun dalla cumissiun da gestiun pils onns 2014/2016 ha liug *dumengia, ils 24 da november 2013*.

Vischinadis, partidas politics localas ni gruppas da silmeins 15 votant(a)s san proponer entochen 30 dis avon l'elecziun candidats e candidatas per la cumissiun da gestiun. Las propostas ein da far *a scret e d'inoltrar entochen sil pli tard gievgia, ils 24 d'october 2013* all'administraziun communal.

Tenor art. 24, al 2 dalla lescha davart ils dretgs politics valan ufficials che han buca demissiunau sco proponi. Per l'elecziun dalla cumissiun da gestiun ei perquei nominau:

- Beat Hosang, 1981, Gonda
- 2 posts vacants

Per ulteriur sclariment stat il canzlist communal bugen a disposiziun. *Suprastonza communal*

Cussegl da vischnaunca – Credit supplementar per sanaziuns dil Center da sport e cultura

Il cussegl da vischnaunca ha avon la tractaziun dallas fatschentas priu investa dil luvratori communal e dil deposit da pumpiers a Cuoz. Silsunter ei il cussegl da vischnaunca vegnius informaus a moda competent davart las investiziuns realisadas el Center da sport e cultura. Il Center da sport e cultura ei segiramein per nossa gastronomia e per il turissem in impurtont motor economic. Per saver mantener la substantza ed augmentar la porschida ein investiziuns els proxims onns inevitablas e necessarias.

En sia seduta dils 23 d'uost 2013 ha il cussegl da vischnaunca sut il tgamun da Flavio Murer concediu in credit supplementar da frs. 130 000.– per sanaziuns dil Center da sport e cultura. Cheu va ei per terminar las davosas lavurs planisadas. Il credit supplementar vegn suttamess al referendum facultativ conform alla constituziun communal.

Suprastonza communal



Referendum facultativ

A caschun da sia seduta dils 23 d'ust 2013 ha il cussegl da vischnaunca concediu unanimamein in credit supplementar da frs. 130 000.– per differentas sanaziuns aunc pendentas el Center da sport e cultura.

Conform ad art. 21, lit. e dalla constituziun communal e quella decisiun suttamessa al referendum facultativ. Il messadi davart la damonda da credit ei exponius per investa en casa communal (stanza nr. 10). Sin proposta da silmeins 80 votants exista la pusseivladad d'inoltrar enviers sura conclus il referendum enteifer 20 dis dapi la publicaziun officiala.

Suprastonza communal

Midada d'adresa enteifer vischnaunca

Tgi che mida casa *enteifer la vischnaunca* ei obligaus d'annunziar la nova adresa all'administraziun communal enteifer 8 dis.

Controlla da habitonts Disentis/Mustér

Pro Senectute: Cuors trenament dalla memoria a Mustér – Fitness per las cellas grischas

En quei cuors treneis Vus la habilitad da seconcentrar e da tener endament meglier. Vus augmenteis Vies scazzi da plaids e treneis igl anflar meglier las expressiuns. Vus emprendis d'integrar sapientivamein ils organs dils senns e saveis augmenter etras quei Voss'attenziun.

Liug: Mustér, vegn aunc communicau

Datas: 4 x venderdis, naven dils 20 da settember

Temps: 13.30–15.45

Menadra dil cuors: Monika Berther-Sommer, specialist per gerontologia SGIPA, trenadra dalla memoria certificada SVGT

Annunzias ed infos: tochen ils 9 da settember tier Pro Senectute Grischun Alexanderstrasse 2, 7000 Cuera

tel. 0844 850 844 (tariffa locala)

Il program detaglia cun tuttas purschidas da cuors dalla Pro Senectute Grischun sa vegnir retratgs tiel post da fatschenta a Cuera, tel. 081 252 75 83.

Uniun da gymnastica da dunnas

Nus entschevin puspei cun la gymnastica *gievgia*, *ils 5 da settember 2013*.

- a) grupp da gymnastica e gymnastica 50+: allas 20.00 en halla 1 e 2
- b) grupp da bal da reit (Netzboll): allas 19.30 en halla 3

Nus selegrein da stedia participaziun.



Frauenturnverein

Unsere Turnstunden beginnen wieder am *Donnerstag, 5. September 2013*.

- a) Gruppe Gymnastik und Gymnastik 50+: um 20.00 Uhr in Halle 1 und 2
- b) Gruppe Netzbball: um 19.30 Uhr in Halle 3

Wir freuen uns auf zahlreiche Teilnehmerinnen.

En num dalla suprastanza: Helga Probst

Gruppa da gimnastica per senioras Mustér

Nus entschevein cun nossa gimnastica ils 6 da settember 2013.
Urari: *Mintga venderdis dallas 13.30–14.30* en halla Cons.

Cordialmein envidein nus nossas commembras.

Tgi enconuscha buca nossa gruppa? Sche Ti has plascher dalla gimnastica neu e fai ina viseta nunligionta tier nus.

Ad in bien e frestg seveser
las menadras

Preavis – 2. zavrada da nuorsas ils 28-9-2013

La 2. zavrada da nuorsas ha liug sonda, ils 28 da settember 2013 a Mustér.

Venderdis, ils 27-9-2013

19.00 Tscheina cun spezialitads da carn tschut el Center sursilvan d'agricultura. Reservaziuns sut info@agricultura.ch ni 081 936 48 00.

20.30 Referat e discussiun cun Christian Bohl, menader dil project «Alplamm», dall'Uniun purila Svizra.

Sonda, ils 28-9-2013

9.00–16.00 Zavrada da nuorsas cun fiera, ustria ed attracziuns a Salaplauna. Informaziuns sut: www.agricultura.ch.

Preavis fiera da resti d'affons a Mustér

Venderdis, ils 27-9-2013 dallas 19.00–21.00
Sonda, ils 28-9-2013 dallas 9.00–10.30

Ulteriuras infos suondan.

Mummas cun affons pigns



Uniun samaritana Mustér

Nies proxim exercezi meinsil ha liug: *Gliendisdis, ils 9 da settember 2013 allas 19.30 en casa da scola, Cons.*

A stedia participaziun envida
la presidenta

Uniun da dunnas Mustér Mummas cun affons pigns

Seruschnar – paterlar – termagliar

Tut ils affons da 0–3 onns cun lur mummas e fargliuns ein cordialmein beinvegni *mesjamna, ils 4 da settember 2013* dallas 15.00–16.30 per passentar in bi suentermiezdi da cumpignia el local Artgin.

Per damondas ni sclariment statt Nathalie Lutz, 081 947 61 94, bugen a disposiziun.

Mummas cun affons pigns Mustér

Di dallas portas aviartas/Tag der offenen Tür ella canorta d'affons/in der Kita Lumpazi

Siehe/mira sut Cadi.